





松雪斎全集

二

特別
A16
1020
2





門和
籍1020
卷2





趙文敏公松雪齋全集

卷三

海上後學曹培廉敬三校

五言古詩

次韻周公謹見贈



池魚思故淵檻獸念舊藪官曹困窘束卯入常盡
 酉簡書督期會何用傳不朽十年從世故塵土滿
 衣袖歸來忽相見忘此離別久細懷德翁隱坐羨
 江滸偶新詩使我和曠里忘已醜平生知我者頗
 亦似公否山林期晚歲雞黍共尊酒却笑桓公言
 凄然漢南柳

清溪池上偶成

竹色雨絲碧蟬聲風際清方池含綠水中有纖鱗
行浮沉各異態亦足悅吾情欣賞方自茲庶復得
此生

重用韻

孤花色更媚密竹氣自清懷彼橋中樂偶茲池上
行榮華或傷性賞靜可怡情坐久不成起待得月
華生

韓定叟自會稽來作詩贈之

蕭蕭晚雨細浙浙幽叢響爐溫動餘馥研潤生新

賞方欣情話款復此丘園想即事可忘憂胡寧困
塵鞅

次韻韓定叟畱別

季冬寒氣結晨興凜嚴霜越江不可涉欲涉悵無
梁飄飄客衣薄烈烈北風涼會少別何多令人心
靡忘相去數百里東西渺相望豈無琴與書撫心
獨徬徨鬢毛各已蒼目視亦茫茫中年別親友作
志因其常安得傳羽翼與子俱飛翔

擬古

長夜何日

我行在中野霜露上沾

繼方象

不我前鬼長嘯我後帝

鼉鼉四寂無人北斗高且明天道誠幽遠吾心
左屏營

哀鮮于伯幾

生別有再逢死別終古隔君死已五年追痛猶一
日我生大江南君長淮水北憶昨聞令名官舍始
相識我方二十餘君髮黑如漆契合無間言一見
同宿昔春遊每拏舟夜坐常促席氣豪聲若鍾意
憤髯屢戟談諧雜叫嘯議論造精覈巍煌商鼎制
駟駿漢馬式奇文既同賞疑義或共析錦囊裝玉

軸妙絕晉唐跡粲然極炫曜觀者咸辟易非君有
何鑒疇能萃奇物最後得玉金瑤琢螭盤屈握手
傳玩餘歡喜見顏色刻意學古書池水欲盡黑書
記往來閒彼此各有得我時學鍾法寫君先墓石
江南君所樂地氣苦下濕安知從事衫竟卒奉常
職至今屏障間不忍觀遺墨淒涼方井路松竹蔭
真宅乾坤清氣少人物世罕覲緋袍儼畫像對之
以沾臆宇宙一何悠悲酸豈終極

酬潘提舉

卧病六

待取古書讀那復能知

新客從

親高談極虛無微言

道真遠宦萬里外飄然絕埃塵歸來如老鶴笑視
世間人胡爲肯顧我扁舟雪溪濱白髮我已老青
雲子當伸京師人物園子往無逡巡而我慵墮久
棲遲甘隱淪

新秋

夜久不能寐坐來秋意濃露涼催蟋蟀月白淡芙
蓉漸覺練衣薄將欲紈扇慵

秋日言懷

暑退草木蘇綠陰秋更繁玄蟬寂無聲螿蟄已復

喧四序有代謝人事何足言塵冠久不彈散髮坐
前軒俛仰歲云莫遲此負朝暄

送姚子敬教授紹興

我友子姚子風流如晉人白眼視四海清言無一
塵結交三十年每見意自新皎皎白駒瘦華髮無
緇磷此行度浙水言采會稽芹會稽山水勝王謝
雅所欣亦有支許儔迭遞爲主賓子往訪遺跡淖
船鏡湖濱狂客雖已去高情自清真以子絕代才
數賢可比倫登山復臨水嘯歌且怡神時時書寄
我用慰情初竊

述懷

我性真且率不知恒怒嗔俯仰欲從俗夏畦同苦
辛以此甘棄置築屋龜溪濱西與長松友東將修
竹鄰桃李粗羅列梅柳亦清新漸與市朝遠頗覺
漁樵親自謂獨往意白首無緇磷安知承嘉惠再
踏京華塵京華人所慕宜富不宜貧嚴鄭不可作
茲懷向誰陳

慶壽僧舍即事

白雨映青松蕭颯灑朱閣稍覺暑氣銷微涼度疎
箔客居秋寺古心跡俱寂寞夕蟲鳴堦砌孤螢炯

叢薄展轉懷故鄉時聞風鳴鐸

送李仲淵同知睢州

西風吹客衣秋日明遠樹蕭蕭班馬鳴念子明當
去人生貴適意要津何必據佐州亦不惡足展經
濟具蛾眉山川秀文俗盛如故喜子過我樂增我
羈旅慮匆匆萬里別益歎相見暮此心如天河隨
子西南注

幽獨二首

閒居無與娛幽獨欣有得松翁善嘯歌花女美顏
色人生亦何爲耳目皆幻適我今未半百鬢髮已

已曰牙齒復動行當爲去客且盡須臾歡忘言
坐苔石

獨坐不自聊披草尋微逕夕陽在高林籬落有餘
暎依依增遠想歷歷生晚聽涼蟬軋鳴箏候蟲擊
清磬大小皆有從雄雌各相應沉吟復躊躇忽覺
西山暝

允懷齋

安西皇
甫先輩

小齋深且明中有萬卷書齋中古君子寸田自耘
鋤人生萬善具政當復其初操存貴勿忘道積乃
有餘時復南榮下靜看雲卷舒

送文章甫陝西都事

籍甚潞公孫去爲西省客矯矯國士風婉婉幕中
畫涇渭寒有聲終華秋更碧聊因佐理餘題詩寄
來驛

美人隔秋水

美人隔秋水只尺若千里可望不可言相思何時
已庭樹多落葉日夕秋風起我今年已衰素髮擁
兩耳回思少年時容顏若桃李美人何當來一笑
懷抱洗未見令我思既見胡不喜

贈李明道尊師

意行仙館欣有
衣時夕
逢嶺
素懸知有道者一見乃如故行當還山中清飈送
雲馭蒼松無凡聲石局有生路風雷坐可致龍虎
儼訶護空令塵中人矯首企煙霧

雲林山中

松風太古聲欲寫不可狀仰觀空翠滴俯聽潮音
壯豈惟塵慮滌亦覺神情王平生獨往意老矣天
所放翳翳林竹間山鳥時一唱俗氛雖云遠勿起
清淨障

九日當采菊登高古相傳我今值佳節燕坐雲林

顛亦有巖間花青蕊露華鮮采采服九英飲水可
長年况茲霜稻熟刈我山下田一飽無復事了我
粥飯禪

題括蒼山成德隱玄洞天

洞天在何許乃近在人間神仙亦人耳仙成厭塵
寰冥冥隱玄洞峩峩括蒼山卿雲時菊勃赤烏昔
飛翻緬懷葛玄翁一往不復還餐霞弄明月解纓
濯潺湲青芝伺時生綠蘿共誰攀服食去道遠孤
坐亦非丹清歌極幼眇朱書勒孱顏千年有白鶴

題先天觀

對此山水詠使人塵慮銷况茲構真館燕坐遠煩
嘉青林蔭戶牖素雲冠山椒松風和澗泉雜佩響
瓊瑤焚香玉女降長齋百靈朝仙道本不遠清都
亦非遙自嗟衰莫年頗費猿鶴招安得生羽翰從
子以消遙

周南翁悠然閣

青山與高人一見如有約悠然相莫逆無語心自
樂凌虛步丹梯攬秀有高閣應同九臯鶴翱翔在
寥廓

夏日即事呈六兄

下簾却畏日開軒納清風雖無政事關亦見好惡
公此心如白璧聊與世容容有兄遠方來一笑杯
酒同我雖不解飲預恐尊中空呼兒更往沽勿使
歎意窮

送謝伯淡

太史院
都事

纂纂棗實繁嘒嘒蟬聲稠炎暑尚爾熾西風猶未
秋憐子觸熱行不憚道里修棧閣天下險錦城西
南陬過家因上冢聖恩賁林丘鞍馬雖驅馳於義
不可畱子材瑚璉器用世美且周明寺方任賢曜

和義久遊去去早言還庶幾別夏

偶記舊時一首

在德清別業時作

春情浩無端野興欣有矚山光豔桃李澗影寫松
竹古來巖穴士白駒在空谷幽鳥何處來啼破林
煙綠

遊幻住庵

雨後溪水溢黃流行地中輕舟何迅邁
泂波兼順風碧蘆榦始長柔桑葉已空
瞬息抵山曲窈窕微逕通青林夾道周
流泉響幽叢多慚衆衲子前路相迎逢
禪居新結構斧斤未輟工雙閣出塵囂
六

窗自玲瓏久矣厭城市飄如脫樊籠妙香清鼻觀
新鷲驚耳聾汲水插山花開牖納風松經聲出廊
廡寂然聞鼓鐘蔬食欣一飽亦與膏粱同緬懷老
尊宿燕坐毗盧峰塵緣苦未斷無由往相從一宿
返歸棹回望但青蔥

清河道中

楊舲清河流開蓬素秋曉爛斑被厓花委蛇順流
藻天清去雁高野闊行人小故園歸有期客愁淨
如掃

夏至

夏至午之半一陰已復
可馴至顧豈一朝
成萬物方茂悅安知有彫零君子感其微慟哭幾
失聲

庭前松

手種庭前松於今二十年清風時過之我琴不須
絃高標傲歲晚秀色凝空煙有懷貞白君世豈知
其立

謝貞居先生寄周鍾

七月六日承貞居先生遠寄周鍾銑間有文象鳧之形則考工
記所謂鳧氏爲鍾者也擊之與夸則合而是日又適立秋古物
之來豈偶然哉輒
成小詩拜賦之辱

故人賞我趣遺我鳧氏鍾制與周禮合試叩聲春
容是日新秋節夸則還爲宮懸之西楹下浮磬儼
在東金石互相應間以絲與桐八音雖未備古樂
將無同鼎尊鐸解卣羅列見古風揖讓於其閒令
我懷周公作詩報佳貺庶以開羣聾

閒居

荒庭蕪弗治翳翳草與筠池魚出娛客林鳥來依
人閒居意自足何者爲戚欣况於黃卷間時與聖
賢親

病中春寒

仲春尚寒氣林花無豔滋
衰疾風雨何淒其始雷發
東隅霽牖陽光披微風草際
動落英池面移幽禽變圓
吭遊魚揚細鬢我病自此愈
泛舟溪水滑小輿指南蓋短
筇問東毗機心不復有高
蹈農與義

松澗詩贈丁師善

青松上參天下有幽澗泉
高人居其閒萬慮不至前
讀書得妙趣視世等浮煙
胡爲舍此去杖策走日邊
要當陳忠益民瘼會有痊
却歸弄泉石靜聽松風眠

興中府某氏見山樓

東北有高樓迢遞數十尺
朝霞映窗牖浮雲來几
席莽蒼一望間翠嶺千峰
碧青山何處無所見多
迫迤偉哉醫無閭周禮載
簡冊我雖身未到心想
已可索但惜道里賒處地
遠且僻嘉彼樓居子不
受世故役愛山如愛客相
對樂晨夕應笑平地人
塵埃坐充斥

贈恢上人

晨坐古松下有僧來叩扉
松花落金粉細細點春
衣折松當塵尾相對澹忘
機湯休不可作政索解

人稀

露坐

露坐夜將半澹然無所為草根蟲鳴歇松梢螢度
遲城市多塵雜令人心不怡茲丘亦可老已與白
雲期

題黃華為其父寫真

仙人紫霞衣危坐古松間玉色映流水不動如丘
山平生黃華老得意每相關九原如可作與君相
對閑

題先賢張公十詠圖

張先子
野之父

吳興瀟灑郡自古富人物溪山映惠榭尊俎照華
髮當時盍簪地蓁莽久蕪沒空餘詩語工不共芳
草歇撫卷想勝風冠佩其改忽先民不可見惆悵
至明發

犀浦遐觀

男子四方志蜀都天下奇李侯并門豪杖節鎮坤
維愛此雪山雄卜宅犀浦滑錦城既云樂焉用還
家為遺像開生面清風凜英姿應同武侯廟人懷
千古思

吳俊卿義塾

禮義生富足爲富或不仁誰能如吳君捐已以惠
人開塾延師儒聚書教比鄰豈徒名譽美要使風
俗淳人物方渺然作養當及辰文章雖致身經術
乃新民宣公相業著輔子理學醇二賢鄉先正千
載德不泯吳君真盛舉勉哉繼前塵何當襲春服
從子語水濱

寄題杜尊師白雲庵瓊秀亭

白雲從何來乃在計籌山山中古仙伯翱翔白雲
間城市多囂塵山林幽且閑結屋松竹裏開窗泉
石邊清齋誦道德焚香降神仙俯仰皆自得洗心

游秦玄稅駕往從之規買山下田葺藥埽白髮栽
桃映紅顏庶幾林下意期了區中緣丹成從師去
笑拍洪崖肩

瓊山發天秀珠泉表地靈柔荑吐丹葩喬林標絳
英酌醴吸沖和汲澗漱甘清石門開洞府木龍走
巖扃清飈一時至四座浮幽馨聞風何必遠世塵
空自冥從遊當有期淹留詎無成左手擷紫芝右
手采黃精振衣陟崇岡遐觀散神情長嘯煙霧裏
滿空鸞鶴聲

七言古詩

楊堅州治水歌

秋水至今大河溢金隄決兮流漂疾田疇汨兮爲
民憂魚鱉肆兮地上游誰能治水兮徵揚侯具畚
鍤兮萬人聚勢悍急兮不可以禦問河伯兮何所
怒歲不登兮民且窶侯精誠兮感神明赤蛇蜿蜒
兮昭厥靈奠桂酒兮薦芳馨神攸歆兮隄防成水
復故道兮民載寧天子聖兮地道平萬歲千秋兮
揚頌聲

題舜舉著色梨花

東風吹日花冥冥繁枝壓雪凌風塵素羅衣裳照
青春眼中若有梨園人攀條弄芳畏日夕只今紙
上空顏色顏色好愁轉多與君沽酒花前歌

兵部聽事前枯柏

庭前枯柏生意盡枝葉乾焦根本病黃風白日吹
沙塵鼓動哀音亂人聽嗟哉爾有歲寒姿受命於
地獨也正雨露雖濡心自苦鳳鳥不來誰與盛豈
無松檟在山阿只有蓬蒿沒人脛我生媿乏梁棟
才浪逐時賢繆從政清晨騎馬到官舍長日苦飢
食還併簿書幸簡不得休坐對枯槎引孤興人生
何爲貴適意樹木託根防失性幾時歸去卧雲林

萬壑松風韻笙磬

題西谿圖贈送鮮于伯幾

山林忽然在我眼攬袂欲遊嗟已遠長松謾謾含
蒼煙平川茫茫際曾巘大梁繁華天下稀走馬鬪
雞夜忘歸君獨胡爲甘寂寞坐對山水娛清暉西
谿先生奇崛士正可著之巖石裏數間茅屋破不
修中有神光發奇字綠蘋齊葉白芷生送君江南
空復情相思萬里不可見時對此圖雙眼明

題二喬圖

長江東來水滔滔誰謂江廣不容舫中有喬家女

兒淚何意師昏隨二豪龍虎方爭欲相啗鸞鳥鍛

翮將安逃不見當時老諸葛獨聘醜婦何其高

題黃素黃庭後

此書飄飄有仙氣意其爲楊許舊跡蓋人間至寶伯幾所藏也

琴心玉文洞玄玄金鈕朱錦乃汝傳子能得之可
長年黃素纈栗兒且堅橫理如髮約兩邊從有赤
道如朱絃文居其閒走玄蛾飛雲卷舒相終始大
道甚夸非力使無爲自然有至理誰能精專換骨
髓埽除俗塵不瑕穢目中有神乃識真白玉爲軼
裝車輪裹以天上翠織成仙人樓居儼長生鸞鶴
翔舞爰猥輕子能寶之慎勿驚宮室之中夜自明

上清真人楊與許焚香汗齋接神女手作此書留
下土千年流傳子為主東方蒼龍右白虎廉不子
求貪不與

戲題出洗馬

齧邾豸駕誰能御駑蹇紛紛何足顧清絲絡首錦
障泥鞭箠空勞怨長路明窗戲寫乘黃姿洗刷歸
來氣如怒不須對此苦歎嗟男兒自昔多徒步

送孟仲則遊荆湖兼往襄漢

行路方難子何往瀟湘洞庭天一方長江風來浪
如雪荆門木落天雨霜千金養容不復見萬甲訪

舊庸何傷子才有用未得試牛刀愛惜藏鋒鏑似
聞遠遊未渠央更欲攬轡趨襄陽昔年戰鬪且休
息白骨已瘞愁雲黃伏龍鳳雛在何處鹿門山色
還蒼蒼登高弔古一長嘯萬事慘淡悲中腸人生
聚散安可常為君起舞君舉觴明朝帆影拂浮玉
寄言客居思故鄉

烈婦行

至元七年冬邠州軍士劉平之戍棗陽與其妻胡俱道宿車下
平爲虎所得胡起追及之殺虎脫其夫吾聞之中原賢士大夫
如此爲感激慷慨
作烈婦行以歌之

客車何焯焯夫挽婦爲推問君將安去言往棗陽

成官事有和和車下夜半可憐逢猛虎夫命懸虎
口婦怒髮指天十步之內血相濺夫難再得虎可
前寧與夫死母與虎生呼兒取刃力與爭虎死夫
活心始平男兒節義有如許萬歲千秋可以事明
主馮婦卞莊安足數嗚呼猛虎逢尚可甯成甯成
奈何汝

送高仁卿還湖州

昔年東吳望幽燕長路北走如登天捉來官府竟
何補還望故鄉心惘然江南冬暖花亂發朔方苦
寒氣又偏木皮三寸冰六尺面頰欲裂凍折弦盧
薄強弩射不過騎馬徑度不用船宦遊遠客非所
習狐貉不具綈袍穿京師宜富不宜薄青衫駿馬
爭騰騫南鄰吹笙厭梁肉北里鼓瑟羅姪妍淒涼
朝士有何意瘦童羸騎雞鳴前太倉粟陳未易糴
中都俸薄難裹纏爾來方士頗向用讀書不若燒
丹鉛故人聞之應見笑如此不歸殊可憐長林豐
草我所愛羈勒未脫無由緣高侯遠來肯顧我裹
茗抱被來同眠青燈耿耿照土屋白酒薄薄無葷
羶破愁爲笑出軟語寄書妻孥無一錢江湖浩渺
足春水鳧雁滅沒橫秋煙何當乞身歸故里圖書

堆裏消殘年

贈相士

我昔放浪江湖間舉頭開眼看青山安知世故不相舍坐受塵土彫朱顏髭鬚已黃行且白亦知人生不滿百功名富貴非我事但願有酒呼好客錢塘江邊逢少年兩眼善相口談天封侯食肉骨法異慎勿置我諸公前江南春暖水生煙何日投閒茗水邊買經相牛亦不惡還與老農治廢田

謝鮮于伯幾惠震餘琴

此琴云是許旌陽手植桐所斲

仙人已歸白雲中空餘手植青松根柯盤鬱如

蛟龍一朝霹靂驅雷公烈火半藝墮狂風箕子之裔多髯翁才氣邁俗驚愚蒙抱持來歸尋國工斲爲二琴含商宮我來自北欣相逢持一贈我爲我容自吾得此不敢寐終夜起坐彈孤鴻下絃清冷上黃鍾轉絃更張涕滿胃黃虞已遠將無同恨君不識牙與鍾恨我不識瞽與矇周南大雅當誰從

贈相者

吾聞伯樂善相馬一顧千金長高價何人倜儻買權奇滿眼鴛駘居櫪下張君年少目有神走半江湖多閱人我生瘦瘠之駿骨浪許騰驤防失真

朝春雨今如晴花枝照眼生春情樓前山色橫翠
靄湖上柳黃飛亂鷺便須沽酒與君飲醉倒花前
猶滿引懶從唐舉問流年欲向德翁謀小隱

漁父詞二首

仲姬題云人生貴極是王侯浮利浮名不
自由爭得似一扁舟弄月吟風歸去休

渺渺煙波一葉舟西風木落五湖秋盟鷗鷺傲王
侯管甚鱸魚不上鉤

儂住東吳震澤州煙波日日釣魚舟山似翠酒如
油醉眼看山百自由

送朱仲陽太平教授

列仙之儒山澤耀手中黃紙新除書教官雖冷實

清選當塗山川如圖畫我生無能自不如盍不從
君賦歸與請君爲我酬太白矯首南望心煩紆

題李公略所藏高彥敬夜山圖

高侯胷中有秋月能照山川盡豪髮戲拈小筆寫
微茫只尺分明見吳越樓中美人列仙臞瘦之自
言天下無西窗暗雨政愁絕燈前還展夜山圖

贈吳真人父封饒國公母饒國夫人

上清真人天上來雲收霧斂天門開手持璽書歸
故里瓊瑤玉佩相追陪堂上老仙千歲壽喜兒歸
來酌春酒帝命建爾于上公老仙拜前兒拜後古

來子貴父母榮今見恩榮萃一門紫衣玉帶照華
髮金冠瑤簡明朝暎人間五福誰能備歲晚寒香
滿天地真人妙行我所知曾是玉皇香案吏

題也先帖木兒開府宅壁畫山水歌

大山翠嶺摩青天小山平遠通雲煙商侯曾中有
丘壑信手落筆分清妍閭風玄圃元不遠燦爛金
碧流潺湲參差澗谷樓觀起縈紆石路朱橋連松
風颼颼響虛閣棋聲剝啄來羣仙漁歌樵唱渺何
許綸巾羽扇清溪邊高情自有泉石趣涼意不受
塵埃纏世閒書畫亦豈少誰能真賞如公賢華堂
風日不到處絕勝繡幃空高懸舉觴酌酒爲公壽
眼明對此三千年

孤燕曲

燕燕復燕燕孤飛不忍見故雄已作長別離孀雌
守節令人羨昔日雙雙拂煙草十年獨宿梁閒藻
歎息人間貞婦少人獨何心不如鳥

題商德符桃源春曉圖

宿雲初散青衫濕落紅繽紛溪水急桃花源裏得
春多洞口春煙搖綠蘿綠蘿搖煙挂絕壁飛流淙
下三十尺瑤草離離滿澗阿長松落落凌空碧雞

鳴犬吠自成，邛居人。一老不相識，瀛洲仙客知。仙
路點染丹青，寄輕素何處有山如此。圖移家欲向
山中住。

秋夜曲

雨聲滴夜清，漏長朱簾金幙浮。新涼閨中美人動，
裁翦故羅衣。袂生秋香，東鄰剝棗，西鄰獲旅館無
人念。飄泊餘不潦盡，涵清輝。芙蓉壓堤，怨不歸牆
根草綠，陰蛾飛。

葡萄架空墮，殷玉遙。夜露寒生，體粟暗蛩棲草鳴。
不平無絲經緯，空勞促夢魂。苦短道苦長，萬山深
處非吾鄉。玉蟲搖缸，螢入屋去。雁來魚應可卜，醒
眼瑩瑩愁萬斛。

孔道輔擊蛇笏

以笏擊蛇有孔公義，與段公擊賊同事之鉅細。雖
有異正氣，忿激生於中。偉哉孔公聖人裔，豈聽妖
邪亂民志。即今槐木一尺強，氣象凜凜含風霜。子
孫守之慎寶藏，絕勝象牙堆滿床。

李氏種德齋

一年之計種穀，十年之計種木，百年種德。知何事
插架鱗鱗書滿屋，世世責報嗟何速。我自無心徼

後福日中爲市百賈以競逐錐刀蛾赴燭鬻書之
利雖云薄妄令舉世沾膏馥爲賢爲智皆由此耕
也未必能干祿他年種德看成功遠在子孫應可

贈張彥古

秋雨新已風日清忽聞剝啄敲門聲出逢麻衣老
仙伯身長七尺雙瞳明平生學道幾半世一見灑
灑心爲輕大道無爲返爾朴自然有路通長生我
今素髮颯以白宦途久矣思歸耕吳興山水况清
絕白雲滿嶺堪怡情老仙何當從我去小築茅屋
依崢嶸還丹已就蓬島近笑指塵海尋方平

送田師孟知河中府

漢二千石入爲相邑令或入爲三公聖朝用人亦
復爾予以此賀田河中田侯年少與予友今三十
年俱白首離觴未盡去馬鳴愁向風前折楊柳

趙克敬耘庵

趙子居室名耘庵不以雨暘爲旱潦寸田尺宅勤
自治稂莠芟夸嘉穀好平生萬事無助長歲晚所
收皆至寶我託官聯幾一載懷抱於人每傾倒交
情雅有古以風此意爲輕薄道况我同姓古所

敦百世可知宜細考
二十年來如一夢
白髮相看今盡老
我方告歸理墓田
莫怪賦詩殊草草

臘脂驄圖歌

騏驎^驎騏驎^驎裹世常有伯樂不生淹棧豆
歛見此圖神自王權奇磊落龍為友
隅目晶熒生紫光錦毛錯落蒙清霜
霜蹄蹙踏寒玉響霧鬣振動秋風涼
朝浴扶桑騰浩蕩莫秣崑崙超象罔
雄姿似隘六合小盛氣欲繭浮雲上
嗅塵一歎驚肉飛奮迅不受人間鞿
豈惟萬馬羞欲死直與八駿爭先馳
只今相者多舉肥歎息此圖誰復知
君不見王處冲半

生隱德真成癡

贈捏古伯

有僧有僧住江心
以色殺人凶且淫
貪官若吏私其金
滅跡鉅海無由尋
安知冤魂痛不釋
羣然號訴衆所覲
盡誅凶儔冤始白
誰其白之捏古伯

送高郎仲德往汝州迎母

八歲失其母每一言之淚如雨
忽然有信自北來知道慈親在
臨汝艱難一別四十年驚喜失
聲渾欲舞水行有舟陸有車
襪被即行身欲羽遙想團圓再
見時膝下急持喧笑語
人生天地誰無

母此別真如隔今古。知孝感動神明萬里言。鳥
復相覩吳興山水清且遠。指日安輿還樂土。我當
埋舟楫迎汝。買紅纏酒。剖肥豕斑衣喜色映庭萱。
曰。坡從教老農圃。

次韻葉公右丞紀夢

倦遊客子何時去。屢欲言歸天未許。故鄉樂事時
上心破浪長魚日。登俎一簞一笠得自由。某水某
丘猶可數。前年有詔舉逸民。一旦馳驛登天府。豈
知佐理自有才。勉強盡瘁終無補。青春憔悴過花
鳥。白日勾稽困文簿。栖栖顏汗逐英俊。往往笑談

來訕侮。倦僕思歸語。見侵瘦馬長飢骨。相拄天生
我公出瑞世。輔相明時期。復古好將圖畫上。凌煙
未遂衣冠掛。神武髭鬚半白稱。貂蟬步履漸輕宜。
印組道長自覺小人消。亂沮政須君子怒。得閑有
兆天與祥吉夢。初回月當戶。因公此意乞歸田。不
辭歌詩爲公舞。

楊天瑞府判平冤詩

正元年間歲辛卯。建寧總管有馬謀。間因盜起建
陽縣。欲引鎮軍肆誅屠。聞民張氏有女子。小名月
娘。大且姝。心得此女。心淫泆。乃誣張氏與賊俱。月

娘逃匿不可得旁乃
女遭姦汙既得月娘欲
口父母親戚皆囚俘一家九人一時斃痛入骨髓
大難呼其餘五人亦瀕死身被榜掠無完膚人家
不幸產尤物破家滅族真無辜楊侯天瑞為府判
深疑此事皆虛誕奮然仗義以死爭力謂馬謀當
併按月娘得脫為良人待盡殘囚出獄犴沉冤極
枉一旦伸臺省交章同論薦聖神天子甚明察詔
下天門發英斷馬謀竟以罪伏誅行路聞之亦咨
歎邑人為侯生立祠牲酒續紛勤薦裸楊侯平反
世希有宜有陞遷示旌勸政事固因才德美歲月
難將資品算即今已過二十年那拋朱紱換青衫
臯夔在位方進賢請為誦我平冤篇

賦張秋泉真人所藏研山

泰山亦一拳石多勢雄齊魯青巍峩此石去走小
岱岳峰巒無數生陂陀千巖萬壑來凡上中有絕
澗橫天河粵從混沌元氣判自然凝結非鑄磨人
間奇物不易得一見大叫爭摩挲米公平生好奇
者大書深刻無差譌等有小研天所造仰受筆墨
如圓荷我欲為君書道德但願此石不用鴛巧偷
豪奪古來有問君此石當如何

題舜舉摹伯時

馬圖

二龍何時飛上天空有駿影人問傳一匹鳳頭來
予聞一匹賜名花滿川李侯作畫述者錢想見溫
公當國年大平時節巡遊少立歸塞飽吞草老
向天顏無戰功馬自不令人驕驕

兔

少年馳逐燕齊郊身騎駿馬如騰蛟牙後生風鼻
出火大呼計來飛鳴嗚嗚如今老人百憂集拄杖徐
行防喘急卷中見畫眼為明驥聞秋風雙耳立

國朝語
謂兔也

來討

贈相師王蒙泉

王君善相多奇中說好誇奇無刺風已將幻化等
虛空問壽幾何持底用遭時之才偶致位處非其
宜常自訟詞林每媿文字拙玉帶却憐腰體重身
歸閭里困衰疾心戀闕庭形夜夢端如老驥欲
倒駿骨雖存難受鞚清溪如玉遶屋廬箇箇漁舟
時看弄且將閒散樂餘生豈望殘年給殘俸

趙文敏公松雪齋八集

卷三

趙文敏公松雪齋全集

卷四

海上後學曹培廉敬三校

五言律詩

春寒

夜雨鳴高枕春寒入敝袍
時光自花柳吾意豈蓬蒿
失色黃金盡知音白雪高山林
隱未得空覺此生勞

雪後同子俊遊何山次韻四首

同是清閒客俱爲放浪遊
晴山依雪壯野水帶冰流
風急松衫亂年登香麥收
生涯雖未老吾欲

菟裘

步履行危磴憑闌得妙峰鳥飛迷故道人去想遺蹤
蹤掩冉風前竹支離澗底松山僧飯不足不是忘鳴鐘

兵革時猶動山林日就荒子真思隱遁詹尹問行藏
有意隨三飯無人饋五漿遠山湖外白立馬見微茫

湍駛波翻雪風生地出雷薄醪隨意盡寒氣逼人來
更欲明朝去何妨迫暮回自憐非李廣醉尉莫相猜

早春

谿上春無賴清晨坐水亭草芽隨意綠柳眼向人青
初日收濃霧微波亂小星誰歌采蘋曲愁絕不堪聽

重遊弁山

出郭聞鶯語穿林散馬蹄澗松何鬱鬱春草又萋萋
萋白石那堪煮丹崖倘可梯平生愛高興只合此幽棲

竹色迷行逕松聲洶座隅水清花自照風暖鳥相呼
飲罷思棋局歌長缺唾壺重來瀟灑地聊足慰

須臾

魚樂樓

樓下南來水清冷百尺深菰蒲終夜響楊柳半谿
陰日月驅人世江湖動客心向來歌舞宴達曉看
橫參

秋夜

草蔓行多露蟲聲報早秋明河斜未轉大火已西
流欲作傳杯飲誰能秉燭遊清晨拂鞍馬適野擬
消憂

次韻陳無逸中秋月食風雨不見

谿月當圓夜看雲起莫愁曾陰連積水伏雨暗清
秋白璧難容玷明珠不可求每因觀節物轉覺此
生浮

獨夜

生事憐吾拙懷人阻道修角聲悲靜夜燈影伴幽
憂水落紅衣老天寒翠袖愁雲中有過雁哀叫亦
何求

次韻子山登樓有感

西北高樓好登臨望眼空弁山橫雨外笠澤浸天
東計乏千金藥羞看百鍊銅只應將世事都付酒

杯中

懷古情何極登危氣尚雄江山一時勝宇宙百年
中翠袖愁空谷綈袍受朔風超然高舉意決肯送
飛鴻

聞角

吹角秋風裏邊聲入暮雲抑揚如自訴哀怨不堪
聞老馬行知道孤鴻飛念羣祇今霸陵尉那識舊
將軍

次韻馮伯田秋興

搖落故園秋谿山處處幽無錢頻買酒多病倦登

樓文采陶彭澤丹青顧虎頭誰能混流俗浩蕩一
浮漚

風緊草木變露寒沙水清蕭蘭嗟共悴鷓鴣忍先
鳴黃閣非吾事青山不世情浩歌聊感激裘馬任
肥輕

興逐秋風發愁隨秋夜長繫書陽鳥遠促織候蟲
忙世已無劉表家徒有孟光故衣寒未補發篋動
幽香

本齋先生輓詩

昔我先君子交游半老儒詞林宗匠在制閫輔臣

須晚節風塵際閒居歲月徂謬稱詩賦善深痛典
型無

德邵龜齡邁神全鶴髮春管寧安阜帽龔勝謝蒲
輪小楷名空在遺言意更親平生知己恨淚落雲
溪濱

公為孟頫作研銘嘗刻之研底
又臨終呼孟頫多所囑故云

贈權季玉兼簡李順甫

幕府文書靜湖山春事多風煙歸逸興花鳥助高
歌自愧諸生後其如二妙何卜鄰應有日退食數
相過

奉和帥初兄將歸見簡

戴子文章伯不為時所知朱絃非衆聽白壁易羣
疑海樹生秋早江船渡越遲莫愁千里別要作百
年期
我坐幽憂疾非君誰與娛清談忘日夜高論到唐
虞天地無青眼江湖有白鬚客居寧鬱鬱歸興託
尊鱸

送楊幼澄教授歸江西兼寄吳幼清

客裏相從久愁中欲別難此行登仕版未覺負儒
冠北度憐江總東歸憶幼安著書應滿屋妙處共

誰看

送李清甫由御史出按四川

蜀道青天上繡衣
驄馬行霜威御史府
春色錦官城
萬里平反報三年
菽水清相逢一杯酒
似爲別離傾

送劉伯常淮東都事

久客倦遊甚思歸
勞寸心之子復南邁
欲別惜光陰
蕭條楚山遠
渺瀰淮水深
夢中不可到
何用解愁襟

晉公子奔狄圖邀端父御史同賦

杌隉居蒲日艱難
奔狄時天方興伯者數子實從之
歲久丹青暗人賢簡冊悲
至今綿上路猶憶介之推

題米元暉山水

卧遊渺萬里楚天清
曉秋初日江山出
白雲山際浮
莽蒼迷煙樹
隱約見孤舟
丹青不可作
思子徒離憂

送張仲實還杭州

張子早英發
哦詩遺垢氛
瘦骨映秋水
青眼視晴雲
黃公酒壚側
王令爲書裙
相望苦不遠
何用惜

離分

食粥

杲杲西流日滔滔東逝波春光薊丘晚柳色上林
多不道含香賤其如食粥何明時無小補郎署謾
蹉跎

酬衛處士見贈

之子有道氣山居詩興多琴清鶴自舞林靜鳥能
歌未遂攜家隱深慙輟棹過他年從杖屨養壽向
巖阿

送吳禮部奉旨詣彭湖

爲國建長策此行非偶然止戈方見武入海不求
仙朱紱爲郎日金符出使年早歸承聖渥圖像上
凌煙

大司農侯公輓詩

理學推高第清朝位列卿政聲先日著經術莫年
精乍識俄離逖方閑遽隕傾重爲天下惜涕淚落
縱橫

和周景遠見寄二首

四海多兄弟交情子獨親方將尋舴艋何意畫麒
麟簿領淹豪士江湖著散人相看俱老大喜見二

毛新

止酒陶彭澤能書王右軍逃禪寧避俗感舊惜離羣澤國茫茫水霜空黯黯雲爲農投老去北望隱思君

奉隆福召命赴都過德清別業

驟喧氣候變幽園卉物淒山雲石上起春鳥雨中啼牽衣憐稚子舉案愧山妻苦被虛名累未得遂高棲

謝石林贈湖石次其韻

怪石曾聽法來從不二門玲瓏浮磬韻斑駁古苔

痕池月巖邊上春雲水面屯微爾能輒贈此意向

誰論

筇竹杖贈天聖長老仁公

仁有詩次其韻

瘦節蒼骨聳膩膚黃玉溫苔間時卓地月下屢敲門持贈松廬老攜尋水竹邨歸來倚空壁夜氣與俱存

胡穆仲先生輓詩

我有三益友對之如古人布衣甘陋巷書冊老遺民淚落黔婁被神傷郭泰巾請爲千字誄書刻上堅珉

贈永清曹顯祖縣尹

赤縣郎官宰清朝學士班雲端雙履去花底一琴
間鴻鵠宜天路麒麟近帝閑會當從此召豈待及
瓜還

贈鄭之僑

我有故人子少年能綴文偏工吟九日已解賦齊
雲落落駒千里昂昂鶴出羣却憐吾老矣鬚鬢白
紛紛

來鶴亭

在杭州開元宮吾往年遊宮中而
適有鶴來因為書二字以名亭

客遊真館日鶴來立圃時援筆二大字欣然千載

期長鳴松月照屢舞竹風吹天路何寥廓吾與爾
同之

大都遇平江龍興寺僧閒上座話唐綦毋潛

宿龍興寺詩因次其韻

聞說龍興寺多年未款扉風林發松籟雨砌長苔
衣殿古燈光定房深磬韻微秋風動歸興一錫向
空飛

李太白酒樓

在任城今
新濟州是

城迴當平野樓高屬暮陰謫仙何俊逸此地昔登
臨慷慨空懷古徘徊獨賞心嶧山明望眼百里見

遥琴

送翟伯玉雲南省都事

萬里雲南路青山落照邊
省郎新紫綬幕府舊紅蓮
見面嗟吾晚觀文覺子賢
只應清淑氣不受瘴溪煙

題趙敬父侍御祖德詩

棄子抱兄子古來聞鄧攸
賢哉趙氏母盛德邁前修
陰騭理須復高門慶自流
詵詵庭下玉簪笏盡公侯

獲周豐鼎 見博古圖第三卷銘六字

豐鼎制特小周人風故淳
摩挲玉質潤拂拭翠光勻
鑄法觀來妙銘文考更真
平生篤好古對此興彌新

贈劉節軒侍御

驄馬人皆避沙鷗意獨閒
天恩霑贈典泉壤慰慈顏
樂在簞瓢外春生杖屨間
閒且行樂但恐趣朝班

雨

槭槭衆葉響滋滋生意新
知誰實揮灑解使盡圓勻
蛛網懸珠絡荷盤瀉汞銀
喜涼生枕簟愁潤逼

衣巾

寄題陸振之與閒堂

一閒天所與萬事世從疎名教有樂地安心爲廣
居林間聽啼鳥濠上看遊魚意適無餘想時還讀
我書

次韻觀復表兄見簡

寒雨何時已停雲不肯開難陪山簡醉空憶謫仙
才梅蕊枝枝發幽禽日日來可能無過我真復要
詩催

載酒無人到山園晝掩門泥深妨步履雨暗只空
却每憶文園渴難忘北海尊何當來就飲聽我撫
桐孫

故兩浙運使李公輓詩二首

昔我閒居日公來作守時敝廬曾寓止暇日每娛
嬉篆籀傳書法絃歌送酒卮情親自茲始歲晚辱
深知

白髮儀刑老清朝侍從班理財羞聚斂治郡已恫
瘝卧疾留南久招魂竟北還向來漳水道淚落郭
西山

五言排律

送張夢符郎中還朝

侍從班行近咨謀出使頻乘輶山水國把酒淞江
春驄馬歌仍在祥麟德自馴大書誠有法妙句不
無神愛士容疎放忘年接隱淪回轅瞻斗極聽履
上星辰此別真堪惜茲情未易陳數公如見問爲
說混風塵

送董叅政赴召

丹極飛明詔鋒車召老臣仲舒經術邃賈誼讜言
陳偃革懷殊俗安田慰遠人公心如皦日江國自
熙春散亂堆床帙蕭颺滿案塵詭隨吾不忍高臥
理還伸入奏能回主當言莫愛身衮衣瞻望重丈
席侍趨頻鉛槧工無益樵漁意已親白鷗波萬里
浩蕩未能馴

投贈刑部尚書不忽木公

胄子何多士明公特妙年詩書師法在簪紱相門
傳曳履星辰上分光日月邊帝心知俊彥羣望屬
英賢大木明堂器朱絲清廟絃古人詞自寡君子
德爲先斷獄陰功厚優儒禮數偏我非天下士人
謂地行仙山好雙游屐溪清一釣船賦詩時遣興
好客恨無錢政爾韋編絕俄聞束帛戔風塵驅驛

騎霜雪灑鞍韉別婦經春夏離鄉整四千家書愁
展讀旅食困憂煎郎位蒙超擢官曹幸接聯屢問
哦鄙句信或有前緣知己誠難遇捫心益自憐樊
中淹澤雉春晚怨啼鴉驥病思豐草鴻冥羨遠天
仁言如借便白首向林泉

送夾谷公分省陝西

憶從長楊獵于時始識公堂堂九尺榦落落萬夫
雄補袞彌縫密能書點畫工勞謙延士類豈弟到
兒童黃閣歸人望青雲有父風驅馳常扈從奏對
每留中暫輟尚書履榮分陝右弓秦山依畫錦燕
雪感秋蓬粉署趨承舊瀛洲忝竊同因公動鄉思
飛夢過江東

秋日即事

今日秋色好天高景不暄清飈動林薄涼意滿丘
樊俗客無因至幽禽時自言露濃金盞側香遠玉
簪繁誰辦東山妓空餘北海尊莫吟招隱賦桂樹
可攀援

元日朝賀

兵曹
時作

閭闔曙光生觚稜瑞靄橫治朝春有象嚴蹕物無
聲簪笏千官列簫韶九奏成形墀簇仙仗翠樹拂

霓旌絕域梯航至來庭玉帛盈皇圖天遠大聖德
日高明兵息知仁布民熙見化行耄倪齊鼓舞率
土共升平

奉贈平章李相公十韻

魚水千年慶龍雲億載春乾元開泰運聖主得賢
臣畫像丹青炳書題刻畫真春宮承寵舊秋谷賜
名新扶日登皇極經邦贊化鈞甘盤基相業傳說
應星辰報國非私已逢時豈愛身誰能動天子今
復見山人始白詩書效行看俗化淳願陳歸美意
作誦比烝民

題楊司農宅劉伯熙畫山水圖

移得山川勝坐來煙霧空窗中列遠岫堂上見青
楓巖樹參差綠林花掩冉紅鳥飛天路迴人去野
橋通邨晚留遲日樓高納快風琴尊會仙侶几杖
從兒僮疑聽孫登嘯將無顧愷同微茫看不足瀟
灑興難窮碧瓦開蓮宇丹樓聳竹宮亂泉鳴石上
孤嶼出江中籍甚丹青譽益知書畫功煩渠添釣
艇著我一漁翁

七言律詩

和姚子敬秋懷五首

林雪齋全集卷四
十四
銅雀春深漢苑空
邯鄲月冷照秦宮
煙花樓閣西風裏
錦繡湖山落照中
河水南來非禹迹
冀方北去有唐風
溪城秋色催遲暮
愁對黃雲沒斷鴻
落日孤城動鼓鼙
愁中畫角不勝吹
山川蕭瑟秋雲淨
草木彫傷暮雨悲
多病馬卿聊假日
數奇李廣不逢時
卷簾白水青山裏
隱几無言有所思
搔首風塵雙短鬢
側身天地一儒冠
中原人物思王猛
江左功名愧謝安
首偕秋高戎馬健
江湖日短白鷗寒
金尊淥酒無錢共
安得愁中却暫歡
吳宮煙冷水空流
慘澹風雲暗九秋
禾黍故基曾

駐輦芙蓉高閣迴
添愁繡楹錦柱蛟龍泣
金沓瑤階鹿豕遊
宋玉平生最蕭索
欲將九辯賦離憂
野曠天高木葉疎
水清沙白鳥相呼
胡笳處處軍麾滿
鬼哭村邨漢月孤
新亭舉目山河異
故國傷神夢寐俱
黃菊欲開人卧病
可憐三逕已荒蕪

聞擣衣

露下碧梧秋滿天
砧聲不斷思綿綿
北來風俗猶存古
南渡衣冠不及前
首偕總肥宛驪裏
枇杷曾泣漢嬋娟
人間俯仰成今古
何待他年始惘然

登飛英塔

梯颺直上幾百尺俯視層空鳥背過千里湖山秋色淨萬家煙火夕陽多魚龍袞袞危舟楫鴻雁冥冥避罔羅誰種山中千樹橘側身東望洞庭波

岳鄂王墓

鄂王墳上草離離秋日荒涼石獸危南渡君臣輕社稷中原父老望旌旗英雄已死嗟何及天下中分遂不支莫向西湖歌此曲水光山色不勝悲

溪上

溪上東風吹柳花溪頭春水淨無沙白鷗自信無機事玄鳥猶知有歲華錦纜牙檣非昨夢鳳笙龍

管是誰家令人苦憶東陵子擬問田園學種瓜

次韻剛父無逸遊南山作

絕頂清秋凌翠煙登臨應費酒如川平生能著幾兩屐負郭何須二頃田初日出雲光射地雙溪入湖波接天升高望遠我所愛青壁有路何當緣

次韻子俊

歲云莫矣役車休蟋蟀在堂增客愁少年風月悲清夜故國山川入素秋佳菊已開催節物扁舟欲買訪林丘從今放浪形骸外何處人間有悔尤

次韻本齋先生即事

林雪齋全集卷四
重攬衣裘敝更寬
徂年欲莫氣先寒
雨中百草難
爲綠
霜後黃花尚耐看
千古清真者
舊傳半生辛
苦腐儒冠
便應築室山阿去
嘉與斯人賦考槃

次韻信仲晚興

蕭蕭殘照晚當樓
寒葉疎雲亂客愁
歲月蹉跎星
北指乾坤浩蕩水
東流古來人物俱
黃土少日心
情在一丘獨立無
言風滿袖青山相
對共悠悠

次韻王時觀

相思吳越動經年
一見情深重惘然
草木變衰人
易老江湖牢落雁
難前秦山半出青
天上禹穴遙

臨古道邊欲說舊遊渾似夢
何時重上剡溪船

錢塘懷古

東南都會帝王州
三月煙花非舊遊
故國金人泣
辭漢當年玉馬去
朝周湖山靡靡今
猶在江水悠悠
只自流千古興亡
盡如此春風麥秀
使人愁

次韻舜舉春日感興

沙頭春日已喧妍
細柳新蒲色共鮮
世事底須求
分外人生何物勝
尊前飛花冉冉催
華髮宿草青
青失古阡回首舊
歡如夢過不知今
日是何年

紀舊遊

二月江南鶯亂飛百花滿樹柳依依落紅無數迷
歌扇嫩綠多情如舞衣金鴨焚香川上暝畫船過
鼓月中歸如今寂寞東風裏把酒無言對夕暉

次韻章得一同原父姪遊蘭澤

綠樹閶闔草接天已愁春盡更聞鶉落花飛絮都
成恨痛飲狂歌渾欲顛起舞有人如謝尚著書無
意似伶立繡筵寶瑟何時會割錦纏頭不計錢

見章得一詩因次其韻二首

水色清連日色黃梨花淡白柳花香即看時節催
人事更覺春愁幽客腸無酒難供陶令飲從人皆

笑酈生狂城南風暖遊人少自在晴絲百尺長
片片飛花欲送春萋萋碧草正愁人黃蜂釀蜜經
營急紫燕銜泥來去頻才似茂陵非晚遇美如曲
逆不長貧久知求富都無益但喜論詩若有神

奉和帥初雨中見贈

陰雨淒淒生夏寒故人望望惜清歡停雲底事能
相阻后土何時可得乾無事甘爲犀首飲切雲聊
著屈平冠閉門客散且高臥戶外泥深沒馬鞍
正坐清談與世違交情如子定應稀圖書跌宕心
猶在裘馬清狂意已非黃鶴未知何日返飢鳥故

林雪齋全集卷四
五
作傍人飛溪南流水清如玉終擬歸休理釣磯

次韻帥初

吳越相望三十年相逢意氣共翩翩長歌白石徒
爲爾遠訪丹砂亦偶然海氣昏昏雲拂地江風颯
颯雨連天他時別後相思處欲問山陰雪後船

多景樓

層巔官閣幾時修遶檻長江萬古流白露已零秋
草綠斜陽雖好莫雲稠平南籌策張華得治內人
才葛亮優景物未窮登覽興角聲孤起甕城秋

東陽八詠樓

山城秋色淨朝暉極目登臨未擬歸羽士曾聞遼

鶴語

樓在寶婺觀觀中老
道士能言諸父出處

征人又見塞鴻飛西流二水坡

瓌合南去千峰紫翠圍如此山川良不惡休文何
事不勝衣

金陵雨花臺遂至故人劉叔亮墓

雨花臺上看晴空萬里風煙入望中人物車書南
北混山川襟帶古今同昆蟲未蟄霜先隕鳳鳥不
鳴江自東綠髮劉伶緣醉死往尋荒塚酹西風

蛾眉亭

天門日湧大江來牛渚風生萬壑哀青眼故人攜

酒共兩眉今日爲君開蒼崖直下蛟龍吼白浪橫
空鷺鸛迴南眺青山懷李白沙頭官渡苦相催

時與

劉伯宣尚書同登

海上即事

白水青林引興多紅裙翠黛奈愁何底從莫醉兼
朝醉聊復長歌更短歌輕燕受風迎落絮老魚吹
浪動新荷餘不溪上扁舟好何日歸休理釣蓑

贈周景遠田師孟

與子同客帝王州一日不見如三秋風高氣肅雁
聲急天青日暖蛛絲遊籬下黃花爲誰好水邊紅

樹令人愁世間萬事可撥遣日日痛飲醉即休一

送李元讓赴行臺治書侍御史

郎署聯班僅一秋旦同趨省莫同休豈惟官事奔
忙共自覺吾儕氣味投驄馬只今登憲府白鷗何
日傍滄洲別離不似今朝惡南望令人生白頭

送劉天錫鎮守鄂州

將軍好武更敦書執戟多年衛帝居扈蹕慣騎天
育馬分符真食武昌魚弓刀行色寒逾壯尊酒風
流澹有餘江路梅花正堪折未應便向故人疎

送繆秀才教授真州

髯生別我將安適言向真州作教官但使清風生
絳帳何妨朝日照空槃東園草木因人勝北固江
山隔岸看才近中年已傷別可堪南望送歸鞍

送閻子靜廉訪浙西

翰林禁近逼青冥憲節乘驄出帝城海內文章歸
渾厚浙西民物望澄清姑蘇落日荷花淨震澤秋
風橘柚明憶向玉階承聖語早歸黃閣慰蒼生

次韻左轄相公

昔年閭里自浮沉郎省那知遂有今老去馮唐堪
底用愁來莊舄向誰吟上林柳色春猶淺西塞桃

花水正深知已如今居鼎鼐不應長此泣南音

次韻左轄相公奉寄行臺中丞徐公

盡日沉迷簿領書何時重得賦閒居已無夢想懸
金印豈有文章到石渠白髮故人霜柏在黃塵遊
子斷蓬如舊遊憶在吳興日自采谿毛膾白魚

送孟君復信州總管

君侯弱冠已專城未許甘終浪得名五馬人生真
足貴一毫寵辱不須驚莫雲去作江東夢秋雨無
忘薊北情歌罷風前折楊柳離觴那忍爲君傾

追輓宋漢臣副使

生世憐余後此公聞人說似涕無從一時文獻交
游裏十載煙霞杖屨中有子能爲先友記臨終方
見古人風秋漪亭上殘陽色猶照先生醉後容

欽頌世祖皇帝聖德詩

東海西山壯帝居南船北馬聚皇都一時人物從
天降萬里車書自古無秦漢縱強多霸略晉唐雖
美乏雄圖經天緯地規模遠代代神孫仰聖謨

送吳思可總管汀洲

七閩南去路崎嶇五馬承恩出帝都地氣喜聞今
有雪民生寧似昔無襦山城酒美傾鸚鵡雨館春

深聽鷓鴣他日相思應悵恨離筵不忍賦驪駒

李仲淵求其弟叔行萬竹亭詩爲賦一首

聞君有弟多栽竹邀我題詩寄遠情翠碧飛來人
政靜鳳凰鳴集實初成江波倒影春雲合山月籠
陰夜氣清我亦有亭深竹裏也思歸去聽秋聲

王氏節婦

夫婦人倫之大者夫死寧容有二天矧是簪纓嫺
母訓故應詩禮得家傳何須斷耳徒驚俗只是持
身已自賢年少寡居今白髮爲君重賦柏舟篇

和姚子敬韻

同學故人今已稀
重嗟出處寸心違
自知世事都無補
其奈君恩未許歸
滄洲白鳥時時夢
玉帶金魚念念非
準擬明年乞身去
一竿同理舊苔磯

趙子敬御史志養堂

志養堂前驄馬歸
融融喜氣動庭闈
能令將種爲書種
可是斑衣勝繡衣
手樹藜萱侵雪色
心同寸草報春暉
不須更上陳情表
壽母康強世所稀

至元庚辰繇集賢出知濟南暫還吳興賦詩

書懷

五年京國誤蒙恩
乍到江南似夢魂
雲影時移半

山黑水痕新漲一
溪渾宦途久有曼容志
婚娶終尋尚子言
政爲疎慵無補報
非干高尚慕丘園
多病相如已倦遊
思歸張翰况逢秋
鱸魚蓴菜俱無恙
鴻雁稻粱非所求
空有丹心依魏闕
又攜十口過齊州
閑身却羨沙頭鷺
飛去飛來百自由

初到濟南

自笑平生少宦情
龍鍾四十二專城
青山歷歷空懷古
流水泠泠盡著名
官府簿書何日了
田園歸計有時成
道逢黃髮驚相問
只恐斯人是伏生

劉端父御史見和前詩次韻答之

少日君多隱遁情微官猶喜得山城腹中洞視渾
無物身外何因更有名忽憶放船茗水去終期背
郭草堂成故鄉一別三千里看見池塘草又生

次韻端父和鮮于伯幾所寄詩

畫舸西湖到處游別來飛夢到杭州百年底用憂
千歲一日相思似幾秋苦憶東南多勝事空吟西
北有高樓只今賴有劉公幹時寫新詩解客愁

春日送廉訪監司赴都

春回北斗轉招搖使節迎春上九霄官道柔楊有
生意私田細麥長新苗東風河水冰初泮遲日沙

提雪易銷入覲彤廷元會畢袞衣留相聖明朝

送劉安道指揮副使還都兼寄李士弘學士

昔來雨雪正霏霏今去春鴻向北飛王事便應歌
杖杜家人未用歎蚍蜉據鞍橫槊軍威壯把酒論
文雅志違爲問瀛洲李學士相思何故信音稀

趵突泉

灤水發源天下無平地湧出白玉壺谷虛久恐元
氣泄歲旱不愁東海枯雲霧潤蒸華不注波濤聲
震大明湖時來泉上濯塵土冰雪滿懷清興孤

繼鄭鵬南書懷

豈不懷歸苦未閑，宦情羈思不成歡。可能治郡如
龔遂，只合臨流似幼安。棋局懶從先處著，醫方留
取用時看。夜來夢到茗溪上，一枕清風五月寒。

驚秋

澤國西風一夜生，故園喬木動秋聲。山川滿目悲
搖落，物色無心得老成。下坂牛羊知故道，親人魚
鳥近幽情。向來豪氣消磨盡，空對年光浪自驚。

德清閒居

已無新夢到清都，空有高情學隱居。貧尚典衣貪
購畫，病思棄研厭求書。圍人焚積夜防虎，谿女叩

扉朝賣魚。困即枕書飢即飯，謀生自笑一何疎。

題山堂

千種青松一萬栽，山堂留得翠屏隈。推窗綠樹排
簷入，臨水紅桃對鏡開。山雉雖迎朝日去，野禽啼
傍夕陽來。老妻亦有幽棲意，數日遲留不肯回。

醉後同張剛父清風樓聯句

碧樹未黃風露秋，晚雲蕭索亂山愁。趙千家疎雨催
砧杵，兩岸殘陽入釣舟。張畫角吹殘人罷市，清尊飲
散客登樓。趙古今回首俱陳迹，唯有溪聲日夜流。張

和鄧善之九月雪

季秋驚見燕山雪遠客淹留愁病身顛顛自傷黃
菊晚橫斜空憶野梅春蒼松翠柏爭擎重紺殿紅
樓迴絕塵想得江南猶未冷嫩橙清酒正嘗新

次韻子敬懷王子慶往吳中

王力購
晉帖

闔閭城郭填姑蘇弔古登臺百感俱秋水遠隨鴻
影沒江雲長傍客帆孤吳時花草于今在晉代風
流絕世無別後故人須有得已應懷寶問歸途

趙文敏公松雪齋全集

卷四

趙文敏公松雪齋全集

卷五

海上後學曹培廉敬三校

七言律詩

海子上即事與李子構同賦

小姬勸客倒金壺家近荷花似鏡湖遊騎等閒來
洗馬舞靴輕妙迅飛鳧油雲判污纏頭錦粉汗生
憐絡臂珠只有道人塵境靜一襟涼思詠風雩

李詩云馳道塵香逐玉珂彤樓花暗鼓雲和光風漸綠瀛洲草
細雨微生太液波月榭管絃鳴曙早水亭簾幙受寒多少少年易
動傷心感喚取蛾眉對酒歌子構名才京兆人年十七賦此詩
不幸早亡雜於唐人詩中未易辨也客有賦十月桃者子構云
劉郎再來歲云莫王母一笑天回春
衆皆鉗口不作亦奇句也因附此

重用韻

更從何處訪蓬壺花滿平堤水滿湖韓嫣金丸落
飛鳥王喬仙履下雙鳧姬姜自愛千金貺遊俠輕
量一斛珠我老不知年少事水邊行散似春雩

次韻西雲長老贈周仲和

江南春水碧於天白鳥滄洲興渺然刺繡可能如
倚市力田終不似逢年幾因蓴菜懷張翰欲把丹
砂訪稚川才力如君強健在不妨沽酒醉花前

送杜伯玉四川行省都事

浣花溪上草堂存今見能詩幾代孫橘刺藤梢隱
藜竹椒漿桂酒薦芳蓀日長畫省文書靜春近岷
江雪浪奔我向東吳君向蜀別離從古解銷魂

次韻李秀才見贈

曾是先皇侍從班龍髯飛去竟難攀重來赤日黃
塵裏夢到清泉白石間豈有文章供世用久判漁
釣與雲閒何當便理南歸棹呼酒登樓看弁山

人日立春

今年人日與春并人得春來喜氣迎宮柳風微金
縷重御溝冰泮玉鱗生陰消已覺餘寒散陽長爭
看曉日明霜鬢綵幡渾不稱強題新句慰羈情

送岳德敬提舉甘肅儒學

苦欲留君君不留奮髯跨馬走甘州功名到手不可避富貴逼人那得休春酒葡萄歌窈窕秋沙首蒼飽驂驅儒冠也有封侯相萬里歸來尚黑頭

送蕭萬戶鎮閬州

錦屏山下蜀江清閬州城南春意生投壺今見詩書帥樹羽遙憐鼓角營遠戍固須煩將略雜耕因足見民情梅花到日應如雪折取繁枝一寄聲

留別潘王

珍重王門晚受知一年長恨曳裾遲分甌共酌人

參飲遶逕同看芍藥枝華屋焚香凝燕寢畫屏摘句寫烏絲吳船萬里東南去采盡蘋花有所思

德昌總管雪後見過而余適往德清別業歸

來承惠詩走筆奉和

年過五十已無聞老子猶容醉吐茵短棹衝寒投別墅朱轡行雪布陽春詩成自可追羣玉筆凍真能秃萬篋且喜豐年多美酒傳杯慎勿厭逡巡

三日後再雪德昌復枉騎見過既而復和前

篇見贈輒亦次韻

夜深萬籟寂無聞曉看平階展素茵茗椀縱寒終

有韻梅花雖冷自知春使君磊落如天驥老我堆
厖似凍綈深愧閉門高卧客枉勞車騎已三巡

已酉元日朝拜喜晴總管次前韻見教復和

一首

公庭拜罷笑聲聞曉色曈曈射錦茵元日不陰占
樂歲太平有象兆新春不知何地來銀甕復報諸
方致白旆四海治安封禪舉岱宗久已望東巡

遊烏鎮次韻千瀨長老

澤國人煙一聚間時看華屋出林端已尋竹院心
源淨更上松樓眼界寬千古不磨唯佛法百年多

病只儒冠相逢已定詩盟了他日重尋想未寒

贈張進中筆生

平生翰墨空餘習喜見張生縛鼠毫韓子未容誇
免穎涪翁底用賦猩毛黑頭便有中書意黃紙寧
辭署字勞千古無人繼羲獻世間筆塚爲誰高

贈放煙火者

人間巧藝奪天工鍊藥燃燈清晝同柳絮飛殘鋪
地白桃花落盡滿階紅紛紛燦爛如星隕燿燿喧
厖似火攻後夜再翻花上錦不愁零亂向東風

輓洞霄章耕隱

松雪齋全集卷五
黃髮蕭蕭瘦骨清每於談妙見高情瓊漿正欲分
丹鼎霞佩胡爲返赤城白鶴歸來華表在碧桃開
盡玉棺成師今此去哀難悼萬壑松風共此聲

題溫雪峰詩蹟

出擁旌麾一俊臣歸尋松竹作閒人龍蛇留遺人
間世泉石逍遙物外身自古神仙皆曠達由來豪
傑豈埃塵山川良是諸孫老華表歸來又幾春

次韻龐夸簡禮部

故山深處桂陰濃雲碓無人水自舂玉友一尊爲
老伴木奴千樹當侯封宦途坎壈謀身拙病骨支

離觸事情早掛一帆歸去好五湖煙景最情鍾

盧彥威用韻見贈亦復次韻

東籬紫菊露方濃西舍黃梁夜自舂蕙帳夜空立
鶴怨松門無鎖白雲封圖書老去心猶在朝市重
來意轉慵豈有高情齊隱逸正緣多病已龍鍾

論書

右軍瀟灑更清真落筆奔騰思入神裏鮓若能長
住世子鸞未必可驚人蒼藤古木千年意野草閒
花幾日春書法不傳今已久楮君毛穎向誰陳

寄題保定杜處士晚翠樓

樓外山光翠不如樓中美人老耽書一尊綠酒劉
伶醉幾點黃花陶令居虛曠自疑風月近孤高應
與世塵疎他時若到丹梯上當有清談一起余

贈張德玉

張君說易萬人誇幽贊神明斷不差動靜六爻雖
有象吉凶萬變本無涯河圖妙在縱橫用皇極曾
傳一倍加自笑已無疑可卜有疑來問爾西家

歲晚偶成

致君澤物已無由夢想田園雪水頭老子難同非
子傳齊人終困楚人咻濯纓久判隨漁父束帶寧

堪見督郵準擬新年棄官去百無拘繫似沙鷗

勝槩樓

樓下寒泉雪浪驚樓前山色翠屏橫登臨何必須
吾土嘯傲聊因得此生簷外白雲來託宿梁間紫
燕語關情濟南勝槩天下少試倚闌干眼自明

次韻杜浩卿詠所藏研

我生老研日相尋手不能神謾苦心墨妙已無王
令帖詩窮空偉杜陵吟質溫未遜連城璧氣潤先
知幾日霖只有子西知鈍體便應刻此當銘箴

送史總管廉訪江東

歷下方誇漢史循江東又見繡衣新可能召父專
前代更有蕭規俾後人佐理非才常自愧別離作
惡向誰陳何當攬轡從公去歸泛清溪采白蘋

贈脫帖木兒總管

將軍鐵馬擁琯弓壯歲分符鎮越中山水多情留
賀監兒童拍手愛山公紫髯似戟君猶健白髮如
絲我已翁說禮敦書殊不忝看君真有古人風

壽平章李韓公

瑞鍾光岳應時需日上天衢手自扶八表同風開
壽域五雲異彩映台符經綸至治歸賢相陶冶斯

文屬大儒爲國白頭身未老掌中行見有明珠

鶴歸亭

在龍虎山虛靖
天師舊亭也

仙去人間有故亭四山林竹鬱青青隱居真誥傳
千古玉局丹文役萬靈白鶴歸來人換世黃雲翔
集夜充庭步虛聲轉松風響思掬巖泉洗耳聽

輓道士危功遠

處世紛紛一夢同覺來虛室已成空藥鑪丹竈塵
埃裏羽節瓊輪杳靄中素壁尚明秋館月青松猶
引夜窗風仙家自有逍遙趣不用悲哀哭斷蓬

送柳湯佐懷孟總管

河山王屋翠岩堯玉輦曾臨號樂郊老子分符稱
太守諸兒倚竹候前茅春苗秋實供廚傳紫筍朱
櫻入貢包手種成陰千樹柳政成應有鳳來巢
送吳真人告歸爲二親八十壽兼降香名山
許邁楊羲奕世仙木公金母共長年斑衣歸戲鄩
君側絳節朝辭玉帝前去去青牛隨紫氣飛飛白
鶴遶香煙大椿自得人間壽八十從今數八千

老態

老態年來日日添黑花飛眼雪生髯扶衰每藉齊
筇杖食肉先尋剔齒穢右臂拘攣巾不裹中腸慘

戚淚常淹移床獨就南榮坐畏冷思親愛日簷

五言絕句

題秋山行旅圖

老樹葉似雨浮嵐翠欲流西風驢背客吟斷野橋
秋

題高彥敬樹石圖

喬林動秋風索索葉自語堂堂侍郎公高懷政如
許

題萱草蛺蝶圖

藜苒無端綠幽花特地妍飛來雙蛺蝶相對意悠

然

題米元暉山水

澄江漾旭日青嶂擁晴雲孤舟彼誰子應得離人羣

黃葵詞

仙掌鬱金衣朝陽風露稀可憐蜂與蝶祇解弄春暉

題孫安之松楸圖

墳墓在萬里宦遊今五年人誰無父母掩卷一潸然

題太白酒船圖

載酒向何處稽山鏡水邊若為無賀老興盡便回船

蕭洒稽山道風流賀季真相思不相見愁殺謫仙人

題彥敬越山圖

越山隔濤江風起不可渡時於圖中看居然在煙霧

寄題真定明遠亭

未到新亭上先題明遠詩雲間歸雁小山外夕陽

遲

獨夜

秋風動林葉夜雨滴池荷孤客睡不著亂蛩鳴更多

因禪師輓詩

先子同年友唯餘此老存安心得禪悅閉戶道彌尊

面帝陳三語還山又幾春蕭然無世累卓爾出埃塵

朱閣非新構青松只舊林佛澄今已逝無復聽鈴

六

佛性無來去羣生自爾悲達觀應大笑政足見渠

癡

作糜活我夫分食及龜魚林深幽磬晚猶想定回

初

題李仲賓野竹圖

并序

吾友李仲賓為此君寫真冥搜極討蓋欲盡得竹之情狀二百年來以畫竹稱者皆未必能用意精深如仲賓也此野竹圖尤詭怪奇崛窮竹之變枝葉繁而不亂可謂毫髮無遺恨矣然觀其所題語則若悲此竹之託根不得其地故有屈抑盤躒之歎夫義尊青黃木之災也擁腫拳曲乃不夭於斧斤由是觀之安知其非福耶因賦小詩以寄意云

偃蹇高人意蕭疎曠士風無心上霄漢混迹向蒿

逢

天冠山題詠二十八首

龍口巖

峭石立四壁寒泉飛兩龍人間苦炎熱仙山已秋風

洗藥池

真人棲隱處洗藥有清池金丹要沐浴玉水自生肥

煉丹井

丹成神仙去井冽寒泉食甘美無比倫華池咽玉

液

長廊巖

修巖如長廊下有流泉注山中古仙人步月自來去

金沙嶺

攀蘿緣石磴步上金沙嶺露下色熒熒月生光炯炯

昇仙臺

仙臺高幾許時時覆雲氣一去三千年令人每翹企

逍遙巖

茲嶺可逍遙下可坐百人豈徒木石居真與玄鶴

鄰

靈湫

湫上有亭名聽雨

靈湫不受汗深淺何足計小憩松竹鳴蕭蕭山雨

至

寒月泉

我曾遊惠山泉味勝牛乳夢想寒月泉攜茶就泉

煮

玉簾泉

飛泉如玉簾直下數千尺新月橫簾鉤遙遙挂空

碧

長生池

竹實鳳將至水清魚自行著我草亭中危坐學長

生

道人巖

道士本避世問之無姓字如何千載後石室有人

至

雷公巖

雷公起臥龍為國作霖雨飛雷掣金蛇其誰敢余

侮

石人峰

巨靈長亘天何時化為石特立一萬年終古無人

識

學堂巖

仙人非癡人山中猶讀書嗟我廢學久聞此一長

吁

老人峰

有石象老人宛然如繪素稽首禮南極蒼蒼在煙

霧

月巖

月巖如偃月風泉灑晴雪仙境在人間真成兩奇

絕

鳳山

山雞愛羽毛飲啄琪樹間照影寒潭靜翔集落花

閒

仙足巖

窈窕石屋間中有仙人躅說與牧羊兒慎勿傷吾

足

鬼谷巖

鬼谷巖前石唐文字字奇何當拂蒼蘚細讀老君碑

風洞

石壁何空洞中有風冷然安知列御寇不向此中仙

釣臺

仙者非有求坐石示投釣咄哉羊裘翁同名不同調

磔潭

神龍或淵潛石洞通水府勿遣兒曹劇飛空作雷

雨

一線天

醢雞舞甕中井蛙居坎底莫作一線看開眼九萬里

馨香嶺

山險通鳥道水深有蛟龍誰言仙樂鳴高人方耳聾

三山石

我有泉石癖甚愛山中居何當從羣公講學讀吾書

五面石

洞中即仙境洞口是桃源何殊武陵路雞犬自成

小隱巖

林藪未為隱仙厓猶可梯終當攜家去瑶草正萋

玄洲十詠寄張貞居

菌山

結茆依菌山焚香候芝蓋真靈幸憫我冠佩時來

羅姑洞

翩翩十絕旛飄飄九疑仙洞口薜蘿長來降是何

霞架海

衆水會一壑天近發霞光晨興新沐竟晞髮向朝

桐花源

誰植斯桐萋萋滿幽谷鳴鳳久不聞何當一來

鶴臺

上有白鶴翔下有幽人居幽人道當成白鶴來不
虛

玄洲精舍

子有鸞鶴想甘同麋鹿遊懸榻應待我分我半玄
洲

紫軒

林君已仙去紫軒名尚存丹光時或現藥鼎夜常
溫

火浣壇

真陽以解形四大何足靳指窮於爲薪火傳不知

盡

玉像龕

我有紫虛像白玉雕琢成貢之華陽天萬年期降
靈

隱居松

真人昔住世所至樹以松當知千歲下遺子以清
風

題仲賓竹

幽人夜不眠月吐窗炯炯起尋管城公奮然寫清
影

此君有高節不與草木同蕭蕭三兩竿自足來清風

題周秀才此山堂

青青雲外山炯炯松下石顧此山中人風神照松色

爽氣在襟袖清風拂絲桐悠然適天趣宴坐心融融

曉起聞鷺

暑氣曉來清時時聞遠鷺還思故園路松下綠苔生

六言絕句

黃清夫秋江釣月圖

塵土染人衣袂煙波著我船窗爲問行歌都市何如釣月秋江

題孤山放鶴圖

西湖清且漣漪扁舟時蕩晴暉處處青山獨往翩翩白鶴迎歸

昔年曾到孤山蒼藤古木高寒想見先生風致畫圖留與人看

題王子慶所藏大年墨雁

鴻雁栖栖遵渚黃蘆索索鳴秋羨殺承平公子筆
端萬里滄洲

七言絕句

不至都下即事

海上春深柳色濃蓬萊宮闕五雲中半生落魄江

湖上今日釣天一夢同

北方謂水
泊為海子

盡日車塵馬足間偶來臨水照愁顏故鄉兄弟應
相憶同看溪南柳外山

送王月友歸杭州

社燕秋鴻各自飛我來君去苦相違西湖西畔梅

如雪應有親朋待子歸

雲木無心漫出山歸來依舊與雲閒何當從子東
南去埽地焚香晝掩關

清勝軒

小草幽香動碧池暖風晴日長新萸南窗晝倚綠
陰靜聽盡行人過馬蹄

浮玉山

玉湖泝水清且閒中有浮玉之名山千帆過盡莫
天碧惟見白雲時往還

鄮南山中

山深草木自幽
絲日聞鷺不見鷺好作東書歸
隱計蹇驢來往聽泉聲

奉樞本齋先生午日絕句二首

風雨淒淒五月寒
綠陰門巷思蕭然
客來載酒非問字
知是先生草太玄
節序匆匆聽自過
榴花能舞鳥能歌
北窗高卧一杯酒
奈得淵明醉後何

采桑曲

野雉朝雊雊且飛
誰家女兒采桑歸
欲折花枝插丫髻
還愁草露溼裳衣

題東野平陵圖

事見笠澤藜書

騎驢渺渺入荒城
積水空林坐自清
政使不容投効去
也勝塵土負平生

次韻剛父即事

玉樹凋傷衆草黃
夜蟲時語怨流光
美人望望隔秋水
不寄相思書一行
淒涼鼓角北風傳
嘈雜琵琶思遠天
白雪有誰知幼眇
翠城空自惜聯娟

搖落山川樹影稀
隴雲時逐雁南飛
苦無淥酒酬佳節
猶有黃華夕暉

溪頭月色白如雪
近水樓臺一萬家
誰向夜深吹玉笛
傷心莫聽後庭花

戲是僧惟堯墨梅

潇洒孤山半樹春
素衣誰遣化緇塵
何如澹月微雲夜
照影西湖自寫真

題范蠡五湖杜陵浣花圖

功名自古是危機
誰似先生早拂衣
好向五湖尋一舸
霜黃木葉雁初飛
春色醺人苦不禁
蹇驢馱醉晚駸駸
江花江草詩千首
老盡平生用世心

梅花

瀟灑江梅似玉人
倚風無語澹生春
曲中桃葉元非侶
夢裏梨花恐未真

酬羅伯壽

江西水清石鑿鑿
士生其間多異才
今去歐黃未爲遠
要須力挽古風回
據鞍北走燕山雪
策杖南遊故國春
萬里歸來頭未白
他年句法更深醇

題蒼林疊岫圖

桑苧未成鴻漸隱
丹青聊作虎頭癡
久知圖畫非

兒戲到處雲山是我師

溪上先人之敝廬南山秀色照庭除何時共買扁舟去看釣寒波縮項魚

送王子慶詔檄浙東收郡縣圖籍

水落江南天地秋西風吹子過東州試開圖籍尋佳處便命舟車作勝遊

安道幽居寄剡源蓬蒿蔚蔚長丘園向來乘興相尋意何事空回不到門

謂帥初

愛古探奇亦可憐錦囊玉軸不論錢擬須跂馬江頭路日日望君書畫船

九月八日雨中悶坐和答仇仁父張季野

客居破屋苦秋雨黑潦侵堦竈欲沉青蕊明朝不堪摘誰能載酒慰幽心

以畫寄高仁卿

碧山清曉護晴嵐綠樹經秋醉色酣誰是丹青三昧手爲君滿意畫江南

題龔聖予山水圖

澤雉樊中神不王白鷗波上夢相親黃塵沒馬歸來晚只有西山小慰人

當年我亦畫雲山雲白山青只尺間今日看山還

目笑白頭輸與楚龔門

杭州雨中

江南十日九陰雨花柳欲開無好春却憶京城二
三月秋千風暖漲香塵

題秋胡戲妻圖

相逢桑下說黃金料得秋胡用計深不是別來渾
未識黃金聊試別來心

題舜舉折枝桃

醉裏春歸尋不得眼明忽見折枝花向來飛蓋西
園夜萬燭高燒照爛霞

懷德清別業

陽林堂下百株梅傲雪凌寒次第開枝上山禽曉
啁晰定應喚我早歸來

谷口春殘黃鳥稀辛夸花落杏花飛始憐幽竹山
窗下不改清陰待我歸

過嚴陵釣臺

富春山中有客星辭榮歸來意更真羊裘坐釣滄
波上却笑劉郎非故人

桐江水色映青山安穩行人掛布帆回首風沙鞍
馬裏不知此地是塵凡

部中暮歸寄周公謹

日暮空街生白煙歸來羸馬不勝鞭明朝又逐雞
聲起孤負日高花影眠
三年謾仕尚書郎夢寐無時不故鄉輸與錢塘周
老子浩然齋裏坐焚香

送山東廉訪照磨于思容

林梢春動紫煙生匹馬東風十日程若到濟南行
樂處城西泉上最關情

絕句

春寒惻惻掩重門金鴨香殘火尚溫燕子不來花

又落一庭風雨自黃昏

喜晴

久雨厭厭愁殺人晚晴猶得見青春急須走馬西
湖路楊柳淡黃如麴塵

簡王搏霄乞夫容杏

杏花枝上紅千葉徧得春饒惱殺人早與折來供
一醉東風如此恐成塵

都南張氏園寓居

尺五城南跡似幽鄉心空折大刀頭杏花飛盡胭脂雪日日東風未肯休

和韓君美二絕句

金山

江水西來接太空中流突兀湧鰲宮妙高臺上一
回首看盡世途風浪中

蘇州

子胥死後已無臣中國由來漸屬秦天下固知多
美婦五湖元自有高人

題所畫梅竹贈石民瞻

故人贈我江南句飛盡梅花我未歸欲寄相思無

別語一枝寒玉澹春暉

伯幾有詩見寄云寄聲雪上
佳公子飛盡梅花不見君

江南翠竹動成林誰折寒枝寄賞音說與雙清堂
上客蕭然應見此君心

題所畫梅竹幽蘭水仙贈鶴臯

千樹瑤芳歷水潛西湖風月鬢成絲江南春色今
何似賴有高人把一枝

蕭蕭葉帶雨聲寒裊裊枝搖月影殘欲引九苞威
鳳宿晴窗試寫翠琅玕

百草千花日夜新此君林下始知春雖無令色如
嬌女自有幽香似德人

翠袖盈盈不受扶天風縹緲降麻姑便應從此東

吳去幾見蓬萊弱水枯

和黃景杜雪中即事

燕雪常飛十月前
敝裘破帽過年年
擁爐自笑何爲者
欲買濁醪無一錢

雪寒淒切透書帷
極目南雲入望低
欲報平安無過雁
忽驚殘夢有鳴雞

君說江南苦未歸
香橙新酒蟹螯肥
何當與子扁舟去
共挽清溪浣客衣

客裏相從意最親
高歌快飲見天真
明年去學潘懷縣
滿縣栽花做好春

當年臨水照春衫
浮玉山前小似藍
歸計未成羈思惡
爲君飛夢到城南

送黃景杜

天下無雙黃印曹
割雞聊復試牛刀
梅花香裏聽衙罷
明月泉邊飲濁醪

偶成絕句二首奉懷宋齊彥學士田思孟省

郎

道山仙府舊曾居
墮在塵埃意不舒
回首故人天上住
如何不寄半行書

乍可望塵迎使者
何堪據案筆疲民
濟南雖有如

澠酒準擬愁中過一春

東城

野店桃花紅粉姿
陌頭楊柳綠煙絲
不因送客東城去
過却春光總不知

湖上莫歸

春陰柳絮不能飛
雨足蒲芽綠更肥
正恐前呵驚白鷺
獨騎款段遶湖歸
明時官府初無事
下走非才自覺忙
奔走塵埃竟何補
故園松菊久應荒

春日漫興

春事匆匆轉眼過
滿城流水綠陰多
西園總有紅千葉
塵土埋頭奈爾何

題朱銳雪景

塵埃困人恒作惡
開卷驚看雪滿樓
安得眼前有此屋
仍呼陶謝與同遊

即事三絕

湘簾疎織浪紋稀
白苧新裁暑氣微
庭院日長賓客退
繞池芳草燕交飛
古墨輕磨滿几香
研池新浴照人光
北窗時有涼風至
閒寫黃庭一兩章

遶屋扶疎竹樹清
飛飛燕雀共生成
貧家白笑無金彈
數樹枇杷總不生

又

草長前庭不用鋤
自然生意滿吾廬
何須直待生書帶
始信康成解著書

牧牛圖

楊柳青青柳絮飛
陂塘草綠水生肥
一犁耕罷朝來雨
却背斜陽自在歸

題孫登長嘯圖

在澗幽人樂考槃
南山白石夜漫漫
空林無風萬

籟寂長嘯一聲山月寒

題山水卷

霜後疎林葉盡乾
雨餘流水玉聲寒
世間多少閒庭榭
要向溪山好處安

詠史

酒酣斫劍氣如雲
屠狗吹簫盡策勳
漢室功臣誰第一
黃金合鑄紀將軍

題羣仙辭

羣仙來會蕊珠宮
花滿瓊山翠滿空
環珮珊珊五雲際
半天鸞鶴舞春風

宮中口號

日照黃金寶殿開
雕闌玉砌擁層臺
一時侍衛回身立
天步將臨玉斧來
殿西小殿號嘉禧
玉座中央靜不移
讀罷經書香一炷
太平天子政無爲

自警

齒豁童頭六十三
一生事事總堪慚
唯餘筆硯情猶在
留與人間作笑談

劉時濟歸來堂

出處由來各有宜
他人何與強吟詩
千年只有陶

彭澤解印歸來更不疑

宿五華山懷德清別業

一夜松濤枕上鳴
五華山館夢頻驚
何當歸去芝亭上
坐聽髯翁韻玉笙

留題惠山

南朝古寺惠山前
裏茗來尋第二泉
貪戀君恩當北去
野花啼鳥漫留連

徐敏父龍虎山仙巖聞雞鳴寄玄卿

天雞三叫白雲中
知有仙家住半空
塵土恍然驚夢覺
碧桃花落自春風

泛泛輕舟泝碧溪
蒼厓萬仞有鳴雞
可惜吾儂不同往
便富著屐上丹梯

題苕溪

自有天地有此溪
泓渟百折淨無泥
我居溪上塵不到
只疑家在青玻瓈

題四畫

桃源

桃源一去絕埃塵
無復漁郎再問津
想得耕田井鑿井
依然淳朴太平民

淵明

淵明爲令本非情
解印歸來去就輕
稚子迎門松菊在
半壺濁酒慰平生

四皓

白髮商巖四老翁
紫芝歌罷聽松風
半生不與人間事
亦畱侯計術中

赤壁

周郎赤壁走曹公
萬里江流鬪兩雄
蘇子賦成奇偉甚
長教人想謫仙風

偶得靈璧石
筆格狀如俗所謂鑽雲螭虎者

因成絕句

玄螭穿透白雲層老眼平生見未曾開闢以來神
物出人間剗剗竟何能

題高彥敬畫

疎疎淡淡竹林間煙雨冥濛見遠山記得西湖新
霽後與公攜杖聽潺湲

萬木公 狂落後唯餘碧色見松林尚書雅有冰
霜操筆底時時寄此心

偶成

竹林深處小亭開白鶴徐行啄紫苔羽扇不搖紗
帽側晚涼青鳥忽飛來

茉莉花開小玉蓮香風引謁泝中仙夢回不記相
逢語明月清圓在枕邊

即事

庭槐風靜綠陰多睡起茶餘日影過自笑老來無
復夢 竹蟻上南柯

橘子花香滿四鄰綠陰如染淨無塵幽齋獨坐鳥
聲樂萬慮不干心地春

贈彭師立

學書工拙何足計名世不難傳後難當有深知書
法者未容俗子議其間

古來名刻世可數餘者未精心不降欲使清風傳
禹古須如明月印千江

趙文敏公松雪齋全集 卷五

